

**Wapiyaro' Kareta PaarꞰ
Nennoko'pꞰ
Tesaroni'ka Pon Kon
Ena'
Ekamanin**

Tesaroni'ka esi'pꞰ eke kuru pata Roman amꞰ nono Ma'sitoniya po. PaarꞰ uya so'si pata'ti'pꞰ miri yau Piri'pai nimi tꞰpo. E'tane ri, inke pꞰra ri, moro usewa'noman nito' esi'pꞰ EsuwerꞰ amꞰ wini tikintasan wakꞰ pe itekare PaarꞰ nekamanꞰ KꞰri'san ekareei EsuwerꞰ amꞰ pen koro'tau, EsuwerꞰ amꞰ eseru yau e'pai iyenasa' kon esi pi'. PaarꞰ a'kwarꞰka'pꞰ to' uya Tesaroni'ka ninto' pe iya miri awonsi'ki itito' pe Periya pona. EmennꞰ'pꞰ, Koren eposa' iya tꞰpo, PaarꞰ uya ti-sakon winon miri awonsi'ki te'tꞰrawasoma isakon Temu'ti winon tꞰmiri pe so'si Tesaroni'ka pon eseru ekamasa' eporo'pꞰ.

Wapiyaro' Kareta PaarꞰ Nennoko'pꞰ Tesaroni'ka Pon Kon Ena' e'menukasa' esi'pꞰ to' pori'mapi'nin pe miri awonsi'ki enari'mꞰra KꞰri'san amꞰ miri yawon kon ku'nin pe. Tenki ta iya to' uya apurito' miri awonsi'ki to' usi'nꞰnkato' ekareei pi'. To' emiya'pontipitꞰ iya tꞰuko'manto' eseru rꞰ'pꞰ pi' to' piyau tesi koro'tau, miri awonsi'ki ei'pitꞰ iya ta'toma pe tekama'popi'sa' rꞰ'pꞰ so'si tau iye'seposa' rꞰ'pꞰ KꞰrai enna'poka'to' kanan pi': Apurinin pe' iyeri'sa' rꞰ'pꞰ KꞰrai enna'pokapꞰ kanan rawiri uya ri pe' tiwiri ri uko'man nito' eporo iyenna'pokapꞰ kanan nꞰne'ai'ne'? Miri

awonsi'ki i'ri a'tai kanan Kurai uye'kapu? Paar# uya si seri weyu anam# to' pana'tipi'to' e'turawasomato' pe t#usewankamai' p#ra Kurai uye'kapu enupikiri te'ku'to' kon yau esii'ma.

Iyawon Ekamanin

Ekamanin (1:1)

Tenki tato' miri awonsi'ki apuripitu (1:2–3:13)

Pana' pe Kuri'san am# n#kup#n# pi' enupan (4:1-12)

Enupan Kurai uye'to' pi' (4:13–5:11)

Iu'matu pe pana' pe enupan nito' (5:12-22)

Iu'matu (5:23-28)

¹ Paar#, Sairas* miri awonsi'ki Temu'ti pokon winipaino,

Papa, Ikuip#n# miri awonsi'ki Itepuru Sises Kurai yau Tesaroni'ka pon kon so'sii enakan:

Waku nonkasa' miri awonsi'ki t#usewankamai' p#ra e'nito' nesii iyenakan kon pe.†

Tenki Tato' Tesaroni'ka Pon Kon Uya Apurito' Pi'

² Tiwiri t#wip#rema kon yau Papa pi' tenki ta pi' ina man ipi'nokon. ³ Miyari ri Papa itese' pi' ina e'to' miri awonsi'ki Ikuip#n# rau tenu kon yau iturawasooi kon apurito' auya'nokon wini iye'seposa', sa'man pe iye'turawasomato' kon usi'n#nkan nito' wini t#utari'n#npai', miri awonsi'ki imoronkato' auya'nokon iye'ku'to' kon uyepuru kon Sises Kurai yau apana'ti kon wini.

⁴ Ina uya i'tu, utonpa ton, Papa ni'n#nkan# ton, ayan#nsa' iya 'nokon, ⁵ ap#ne p#ra ina uya

* **1:1** Kiri' Sir#panas, Sairas tato' t#ron ni pe. **1:1** Inkup#p# 17:1

† **1:1** T#ron ni pena imenukasa' ton uya iponanti Papa, ukuip#n# kon miri awonsi'ki Itepuru Sises Kurai winon ta.

wakꞰ itekare ne'sa' ipiya'nokon, main pe riꞰen pen e'tane merunti pe ri mari, WakꞰ AkwarꞰ yau, miri awonsi'ki ito'ka'nakꞰ auya'nokon ina nꞰsauro'ai'ne' ipi' kuru esi i'napairon pe. I'tu auya'nokon ina uko'mamꞰpꞰ ipiyau'nokon ipika'tinin kon pe. ⁶ Imiri'nokon uya ina nakupꞰpꞰ miri awonsi'ki Iteperu nakupꞰpꞰ ton kupꞰpꞰ ekamꞰn ton ni ekota'man annau ri. Main ereutanakꞰpꞰ auya'nokon pori' WakꞰ AkwarꞰ natꞰpꞰ ike ke. ⁷ Miri pi' si, tanporo Sises apurinin nan Ma'sitoniya miri awonsi'ki A'kaya pon kon uya ento' ipi' pe iyenasa' kon. ⁸ Main Iteperu iwano' utisa' ipiyapai'nokon Ma'sitoniya miri awonsi'ki A'kaya yau riꞰen pen—Papa apurito' auya'nokon enasa' ti'tusen pe mi awiri ri. Miri pe iyesi pi', inꞰ' yan pi' ri ina nekama ton itekare pꞰra man miri enta'. ⁹ Mi airi ri ina uti kaisa ri, ka'pon amꞰ' usaurokꞰ, iye'ku'sa' ru'pꞰ pi' ina ereutanakꞰ auya'nokon yau. Iyera'tisa' kon Papa winikꞰi' apurise'na ika'sa' ton piyapai, tꞰuko'mansen miri awonsi'ki i'napairon Papa winikꞰi' iyapiyo' pe e'se'na tukai' to' uya ekama, ¹⁰ miri awonsi'ki Imu uyepꞰ EpꞰn ponsi'ki enupikiri iwesi kon pa, ini'mꞰ'sa'ka'pꞰ iyerikꞰpꞰ apai—Sises, kꞰri ri uri'nokon pika'tinin tꞰuye'sen kota'man nito' piyapai.

2

PaarꞰ E'tꞰrawasomato' Tesaroni'ka Po

¹ Utonpa ton, i'tu auya'nokon ina uya aka'kꞰranpasa' kon a'tai, notꞰn pe iyesi'pꞰ

pen. ² Mi'tuyat'ai'ne' kasa ri, wapiya kuru ina kota'ma'pɛ to' uya miri awonsi'ki ina sapema'pɛ to' uya Piri'pai yau, e'tane Papa itese' pi' ina e'to' uya tɛpika'tii' ina esi wakɛ itekareei inekamapai kuru ipi'nokon pana' pe ri ewa'nomanin e'tane. ³ Apɛne pɛra ina nekama'ponɛ ipan pe esi ipokena' pen wini iye'sa' pe pen miri pe pɛra iri pe ina eseru esi pen ni, miri pe pɛra ina uya ri iyenku'ti kon pen. ⁴ Miri kasa pen, ina usaurokɛ ka'pon amɛ' Papa uya wakɛ ku'sa' auya'nokon man tasa' ipi' ton pe wakɛ itekare nonkasa' itena' ton pe itesa' pe ina e'to' pe. Ka'pon amɛ' uya tapuripi'to' kon pe ina esi pen e'tane Papa uya ri ken tapuripi'to' kon pe. Papa esi ina ewan i'tupi'nin. ⁵ I'tu auya'nokon ina usauro'sa' pɛra iyese poro' pe iku'nin kon pe, ina uya mentai te'to' kon wapu'ti pɛra iyese ipiyapai'nokon emɛ' wapu ke—Papa uya ri niri i'tu. ⁶ Ka'pon amɛ' uya ina apuripitɛ i'se ina esi'pɛ pen, imiri'nokon ni miri pe pɛra inɛ' yan ni.

⁷ Kɛrai nennoko'san pe itekare ekamai' ina nesii'no iyerupa'nokon pɛrata wini, e'tane i'si'mɛn yaino kon pe ri ina esi'pɛ i'koro'tau'nokon, isan esi aiko ton tɛmunki mainanpa pi' kasa.* ⁸ Ina uya ipan pe ri inɛnka kon; miri uriya', ipan pe ri poro' pe tesi kon wenai ina esi'pɛ, wakɛ ri ken Papa ekareei ekama pi' ipi'nokon pen, e'tane ina uko'manto' ri niri tɛnin pe iyena'nokon, apɛne pɛra ina inɛn pe iyenasa' kon wenai. ⁹ Utonpa ton, mi'tuyat'ai'ne' kasa ri ina e'tɛrawasoma'pɛ sa'man pe ri ipiyau'nokon tesi kon a'tai, ewarupi nawiri

2:2 Inkupɛ'pɛ 16:19-24; 17:1-9 * **2:7** Tɛron ni imenekasa' ton uya, i'si'mɛn yaino pe, isan uya tɛmɛre kupɛ kasa mana' pi' ta.

ri miri awonsi'ki wai nai'ne ri iyerupa'nokon ina esi namai', waku Papa ekareei ekama pi' tesi kon koro'tau ipi'nokon.

¹⁰ Imiri'nokon esi ennin nan pe, Papa ri kanan esi, waku pe, ipokena' pe miri awonsi'ki ima'takuu para ri ina esi'pu imiri'nokon apurinin nan koro'tau. ¹¹ Apune para i'tu auya'nokon akaisari'nokon ina uya apanama'pu kon, tumunki ton panama ikupunu uya kasa, ¹² ipori'mapitu kon, aya'kwaru kon ne'pitu pi' miri awonsi'ki ayapiyo'ma kon pi' iuko'manto' kon yau iuko'mamu kon pa Papa e'to' i'se awiri, iki'manin kon esa' wanni pe miri awonsi'ki eke pe tupokon pe iwe'to' kon ya'.

¹³ Miyari ri tenki ta pi' ina man Papa pi', apune para itekare etasa' auya'nokon pi' ina nekamanu, apuri'pu auya'nokon ka'pon amu' nakoneka'pu pe para ri, e'tane na'ne' kasa kuru ri, Papa Maimu ri, e'turawasoman pi' na'ne' imiri'nokon apurinin nan yau. ¹⁴ Apune para imiri'nokon, utonpa ton ena'pu Papa so'sii ton Isutiya pon kon kasa, Kurai Sises ese' pokon kon: Apata'se' yawon kon uya ri ikota'ma'pu kon, Esuweru amu' uya apurinin nan kota'ma'pu ru'pu kasa ri mari. ¹⁵ Kamoro ri Esuweru amu' uya ri mari Itepuru Sises miri awonsi'ki pu'kena' ton tu'ka'pu, kamoro uya ri mari ina enpa'ka'pu. Seri kupu to' uya esi Papa ewaruma pe, tanporon kon ni pi' isi pe to' esi. ¹⁶ Ina uya itekare ekama i'se para to' esi'pu Esuweru amu' pen pi', to' epika'tito' pe. Seri kasa ri tumakooi kon ka'pu'tinin nan ipu'ku pona ri. Iye'seposa' si,

2:14 Inkupu'pu 17:5 **2:15** Inkupu'pu 9:23, 29; 13:45, 50; 14:2, 5, 19; 17:5, 13; 18:12

Papa uya kota'man nito' uye'to' to' pona iu'matꜫa pe ri.†

Paarꜫa E'to' Tesaroni'ka Pon Kon Inenpai Ipan Pe

17 E'tane, utoŋpa ton, aka'ne' pe ri ina pꜫara ipiyau'nokon iyese'pꜫa a'tai (ka'pon pe, usenuminkan nito' yau pen), ipan pe ina e'to' iyenpai'nokon yau iyento' kon pe sa'man pe ina usi'tu'pꜫa. 18 Apꜫane pꜫara itipai ina esi pi' ipiya'nokon—i'nai ri sa'ne uri, Paarꜫa uya iku'kaa'pꜫa miri awonsi'ki iku'kaa'pꜫa uya kanan—e'tane Se'tan‡ uya ina ereutanꜫa'pitu'pꜫa. 19 Apꜫane pꜫara i'ri ken esi ina e'ku'to' pe, ina epori'mato' pe, miri pe pꜫara aro', kꜫaron tato' ina utapurito' yai pe, Sises ina epuru rau iyepꜫa a'tai? Imiri'nokon pen pe'? 20 I'nai ri kuru, imiri'nokon esi ina apuripi'to' ipikiri pe miri awonsi'ki ina epori'mato' pe.

3

1 Miri a'kure'ti tꜫaya'nokon poken pꜫara iyese pi', wakꜫa pe kuru iyese tiwi ina e'ninsa' a'tai A'tens po tukai' ina usenuminka'pꜫa. 2 Ina uya Temu'ti ennoko'pꜫa, ina tonpa miri awonsi'ki Papa e'turawasoma tonpa* Kꜫurai wakꜫa ekareei ekama pi', imeruntitanꜫa'se'na'nokon miri awonsi'ki ipori'mapi'se'na'nokon apurito' auya'nokon yau, 3 miri ti'tupi'to' pi' inꜫa' ri utanpokꜫama namai'. I'tu auya'nokon ni, seri ton yai ri epa'kan tasa'

† 2:16 iu'matꜫa pe ri; miri pe pꜫara, enuka'sa'. ‡ 2:18 Se'tan—Makoi ese' isakon, Papa eseru ewaruma'tinin ta e'kwa pe.

3:1 Inkupꜫa'pꜫa 17:15 * 3:2 Tꜫaron ni imenukasa' ton uya, ina tonpa miri awonsi'ki Papa e'turawasoma tonpa ta; tꜫaron ni ton uya kanan, ina tonpa miri awonsi'ki Papa apiyo' ta.

Papa uya. ⁴ I'nai ri, ipiyau'nokon tesi kon a'tai, seri ton ni ekama pi' ina ne'tai ka'pon amu' uya ri ukota'mato' kon oton. Miri ta'pua awiri ri iye'kupa, mi'tuyatui'ne' ri. ⁵ Miri wenai, a'kure'ti uya poken pua iyese pi', apurito' auya'nokon i'tuto' pe uya, Temu'ti ennoko'pua uya. Enari'numu'pua i'ri wini ri na'ki i'tupi'nin uya ii'tupi'sa' kon, miripan ina e'tarawasoma'pua ru'pua na'ki esi notun pe ri tukai'.

Pori'mapi'nin Temu'ti Nekamanu

⁶ E'tane Temu'ti si enna'posa' man seri pe kuru ina piya', ipiya'nokon tauti tupo, miripan uya waku pe ri Papa apurito' auya'nokon miri awonsi'ki iusi'nankato' kon ekareei ne'sa' man. Ina pi' waku pe iusenuminkapitu kon tukai' ina pi' ekamasa' iya man miri awonsi'ki ina kanan inenpai kuru iwesi kon, ina esi iyenpai'nokon kuru na'ne' kasa. ⁷ Miri pe iyese pi', utonpa ton, tanporon ina usewankamato' yau miri awonsi'ki Papa wenai ina kota'mato' yau ina epori'ma'pua ipi'nokon, apurito' auya'nokon pi'. ⁸ Seri nin si ina a'kwaru uye'ka'sa', pana' pe iye'mu'sa'ka kon pi' Itepuru apuri pi' iwesi kon pi'. ⁹ Nai kasa tenki ta ina uya eke pe Papa pi' ipi'nokon, tanporon pi' pori' pe ina esi entakanomanin pe Papa itese' pi' ina e'to' rau imiri'nokon uriya'? ¹⁰ Ewarupi nau miri awonsi'ki wai nai ri ina ipurema'pua ipan pe ina uya iyenka'to' kon pe kanan miri awonsi'ki apurito' auya'nokon yau ipua na'ne' ke irepato' kon pe.

¹¹ Miri pi' si, tiwi Papa itese' pi' e'nito' miri awonsi'ki ukupuanu kon tumiri pe ri miri awonsi'ki uyepuru kon Sises ina e'ma konekai ina uye'to' pe

ipiya'nokon. ¹² Tiwi Itepuru itonpa kon pokon pe iusi'nankato' kon emo'kai miri awonsi'ki nanu'kai miri awonsi'ki tanporon kon ni niri iwano' pe, ina iwano' nuku'ai'ne' kasa ipi'nokon. ¹³ Tiwi iyewan kon pana'pantanaku, waku pe, imakooi para iwesi kon pa, Papa, itese' pi' e'nito' miri awonsi'ki ukupunu kon rau, uypuru kon Sises uypu a'tai tanporo waku ton pokon pe.

4

Uko'man Ni Papa Pori'manin Pe

¹ Miyari ri man, ina tonpa ton, ina uya iyenupakaa'pu kon iuko'mamu kon eseru ke Papa pori'manin pe. Inapairi ri iyese, miri awiri ri mako'manyatui'. Seri si ina uya iyekama'po kon miri awonsi'ki ayapiyo'ma kon Itepuru Sises yau seri kupu kon pa miyari ri. ² Apune para miri iku'ti' ta'pu ina uya ipi'nokon Itepuru Sises meruntiru yau i'tu auya'nokon.

³ Papa eseru esi waku pe kuru iyekoneka kon i'se: ekuman nito' tuku'se para; ⁴ akaisari'nokon ipun kon esa' pe te'san pe iusenupato' kon esi waku pe te'sen awiri miri awonsi'ki tanamasen pe e'nito' awiri, ⁵ niki' pe para Papa punon kon, Papa i'tunin nan pen kasa; ⁶ miri awonsi'ki seri rupi yau inu' ri tutonpa ku'nin ipoken para miri pe para ipi' ri ku'sennakanin. Itepuru uya ka'pon amu' kota'ma miri seri ton wenai, ina apana'tita'tuine' miri awonsi'ki apanamaka'ta'tuine' kasa. ⁷ Apune para Papa uya uki'masa' kon para iyese iri pe e'nito' pe, e'tane waku pe uko'man nito' yau uko'man nito' kon pe. ⁸ Miri pe iyese pi', kuri seri miri

iku'ti' tato' ewaruma'tinin uya ka'pon ewaruma'ti pen e'tane Papa ewaruma'ti iya, irepanin WakꞰ Ta'kwarꞰ ke.

⁹ Seri nin si isitonpa pe usi'nꞰnkan nito' pi' imenukapai'nokon pꞰra ri ina man, apꞰne pꞰra Papa uya ri iyenupasa' kon tꞰusi'nꞰnkasan pe. ¹⁰ Inapai ri si tꞰusi'nꞰnkasan pe me'atꞰi' itonpa kon amꞰ' pokon pe Ma'sitoniya awiri ri. E'tane ri, ina tonpa ton, miyari ri isi'nꞰnka kon pa ipan pe ina uya iyekama'po kon. ¹¹ Patanti pe iuko'manto' kon pꞰra e'paino kon ye' pe ekonekati', apantomꞰ kon ni tꞰmainanpai' te'san pe miri awonsi'ki iyemiyatꞰ kon ke te'turawasomasan pe, ina apana'tita'tꞰine' kasa ri, ¹² wꞰi kaisa ri iuko'manto' kon uya mi airon kon ku'to' pe anamapai'nokon, miripan si inꞰ' erupa' ri te'san pe iwesi kon namai'.

Itepuru Uye'to'

¹³ Ina tonpa ton, i'tunin nan pe pꞰra iwesi kon i'se pꞰra ina man kamo iye'nꞰnsa' kon pi', miri pe pꞰra tꞰusewankamasan pe tꞰron kon ka'pon amꞰ' kasa, iye'ku'to' pꞰnon kon. ¹⁴ Apuri'nokon Sises eriku'pꞰ, miripan kanan e'mꞰ'sa'ka'pꞰ; miri pi' nin si apuri'nokon Papa uya ipokon pe kamo iye'nꞰnsa' kon nꞰ'san itese' pi' esii'ma ne'to' oton.

¹⁵ Itepuru maimu na'ne' kasa ri, ina uya apana'ti kon uri'nokon nurine ri mari na'ne' nan, iye'nonkasa' kon Itepuru uyepꞰ pꞰ'kꞰ pona uya iye'nꞰnsa' kon nꞰ'san wapiya'kato' oton pari pen ni. ¹⁶ ApꞰne pꞰra Itepuru u'tito' oton EpꞰn apai, eke pe imaimu, inserꞰ amꞰ' epuru maimu pokon pe miri awonsi'ki tꞰronpi' uturumꞰ Papa

maimu pi' pokon pe, miri awonsi'ki eke' ton Kurai ese' pi' esii'ma iyeri'sa' kon e'mu'sa'kato' oton wapiya. ¹⁷ Miri tupo, uri'nokon, nurine ri mari na'ne' nan, iye'nonkasa' kon e'sepoto' oton to' pokon pe kapuru' yau, ka' yau Itepuru epose'na. Miripan e'nito' oton kon Itepuru piyau tiwi ri. ¹⁸ Miri pe iyesi pi', seri ton main ke itonpa kon amu' ipori'mapi'ti'.

5

Itepuru Uyepu E'ma Ta' Ekonekan

¹ Seri si, ina tonpa ton, iweyu ton miri awonsi'ki iwekusi ton pi' imenukato' kon pura ina man, ² apune pura i'tu auya'nokon waku pe, Itepuru weyu uye'to' oton ama' kasa ewarupi nau. ³ Ka'pon amu' uya, "Ewankamanin pura man; isi yau pura e'ni man," ta koro'tau, to' uma'tato' uye'to' oton ite'kwanau pura ri, mono' e'tinka a'taino kasa, miripan kon ainanto' oton pen.

⁴ E'tane imiri'nokon, ina tonpa ton esi ewarupi nawon kon pe pura; miri wenai, Itepuru Sises uyepu weyu uya iyewansiukato' oton kon pen ama' kasa. ⁵ A'kwa munki pe iwesi kon, wui munki pe iwesi kon. Uri'nokon esi ewarupi nawon kon pe pura. ⁶ Miri wenai, taron kon kasa pura e'nipai'nokon iye'nansa' kon pe na'ne' nan, e'tane tenu ke miri awonsi'ki iwano' wanni pe tause'se'tii' e'nipai'nokon. ⁷ Apune pura kamoro te'nansan, e'namu ewarupi nau, miri awonsi'ki kamoro te'taripasan, e'taripa ewarupi nau. ⁸ E'tane wui enawon pe e'ni'nokon wenai, uiwano' kon pe

tause'se'tii' e'nipai'nokon, apurito', i'nankato' ya tenai' uparopo kon wapu pe te'sen kasa, miri awonsi'ki epika'tin tukai' e'ku'nito' uyarukooi kon pe te'sen kasa. ⁹ Apune para Papa uya uyanansa' kon pen kota'man nito' kon pe tuya, e'tane epika'tin nito' eponin pe uyepuru kon Sises Kurai poro. ¹⁰ Iyeriku'pa uponaro' kon pe, nurine e'ni pe iyese yau, eri'nisa' pe ri iyese yau, ipokon pe ri uko'man nito' oton kon. ¹¹ Miri pe iyese pi', itonpa kon amu' taporimapi'se, tupa'kapi'se e'ti', maku'atui'ne' kasa ri.

Iu'matu Pe Miri Iku'ti' Tato'

¹² Seri si ina uya kanan iyekama'pokapu kon, ina tonpa ton, sa'man pe i'koro'tau'nokon ne'tarawasomayai'ne' nan inamaka'ti', iyese kon pe na'ne' nan Itepuu yau, apanama kon pi' na'ne' nan. ¹³ To' tarawasooi pikiri to' inamaka'ti', to' i'nankaka'ti' mara ri para. Tausewankamai' para itonpa kon amu' pokon pe iko'manti'.

¹⁴ Ina tonpa ton, ina uya iyekama'pokapu kon, emiya'ne' pe te'san ipanamaka'ti', enari'ke' te'san enari'mankaka'ti', i'si'mura te'san ipika'tika'ti', kisetakatu tanporon kon pi'. ¹⁵ Inu' uya ri iri ku'sa' yau ipi'nokon, kusentakanomatuu iri ke ri mari, e'tane tiwiri ri sa'man pe ri isi'tuti' waku pe itonpa kon amatu pe e'ni pi' miri awonsi'ki tanporon kon pi' ri niri.

¹⁶ Pori' pe te'san pe e'ti' tiwiri ri; ¹⁷ tause'takai' para iparemati' miyari ri; ¹⁸ tanporon yau ri Papa pi' tenki ka'ti', seri kupu auya'nokon i'se Papa esi miri Kurai Sises yau.

19 Iya'kwaru kama'tu kusenku'n'u'tuu; 20 Pu'kena' amu' nekamanu ku'ku'tuu se pe ri. 21 Tanporon i'tupi'ti'. Waku pi' ata'siti'. 22 Tanporon i'si'taino pe na'ne' iri ton ku'ku'tuu.

Papa Uya Waku Tuto' Pe Tesaroni'ka Pon Kon Pona

23 Tiwi Papa ri tumiri pe, Papa, tusewankamai' pura e'nito' esa' ikonekai'nokon tanporo ri. Tiwi tanporo aya'kwaru kon, iyewan kon miri awonsi'ki ipun kon nenkurumu tuma'takuu ke pura uyepuru kon Sises Kurai uyepu a'tai. 24 Kuri iki'manin kon esi iyawiron ye' pe ri, miri awonsi'ki ikupu iya ri.

25 Ina tonpa ton, ina pona ipuremati'.

26 “Miyari,” ka'ti' tanporo utonpa kon amu' pi', waku pe e'ni eseru yau to' a'su'ka pe.

27 Ta uya ipi'nokon Itepuru rau, seri si kareta mekamatai' tanporo utonpa kon amu' pi'.

28 Waku nonkasa' uyepuru kon Sises Kurai uya nesii ipiyau'nokon.

**Wakɔ Itekare: Emenna' Pe Ekonekan Nito'
New Testament in Akawaio (GY:ake:Akawaio)**

copyright © 2010 Wycliffe Bible Translators, Inc.

Language: Akawaio

Translation by: Wycliffe Bible Translators, Inc.

Akawaio

ake

Guyana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akawaio

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0a50da4e-768d-5472-9dd1-d9747ff5918f